

Značajne devizne i zlatne rezerve Irana

3 februar 2012 Izmijenjeno 07:38 CET

Predsjednik Privredne komore Teherana kaže da Islamska Republika ima 120 milijardi dolara i 907 tona zlatnih rezervi



Iranski zvaničnici kažu da nemaju nikakav manjak stranih valuta ili zlata kada se radi o domaćoj tražnji [AFP/Getty]

Predsjednik Privredne komore Teherana Jahija al-Ashak odbacio je strahovanja o manjku rezervi stranih valuta u Iranu i rekao da Islamska Republika ima 120 milijardi dolara i 907 tona zlatnih rezervi. On je kazao da je Iran kupovao zlato posljednjih nekoliko godina po prosječnoj ceni od 600 dolara po unci, a da je trenutna cijena zlata gotovo utrostručena, objavila je poluzvanična novinska agencija Mehr. "Nemamo nikakav manjak stranih valuta ili zlata kada se radi o domaćoj tražnji", rekao je Al-Ashak.

Iran je kupovao zlato po prosječnoj cijeni od 600 dolara po unci, a trenutna cijena je gotovo utrostručena.

Njegova tvrdnja je uslijedila pošto je nedavna nestabilnost na iranskim tržištima zlata i deviza dovela do iznenadnog rasta cijena robe za oko 10 posto i izazvala paniku među građanima, prenosi zvanična kineska novinska agencija Sinhua. Posljednjih sedmica je vrijednost iranskog rijala značajno opala, poslije odluke SAD-a i njihovih evropskih saveznika da uvedu sankcije iranskoj centralnoj banci, kao i embargo na uvoz nafte iz te zemlje.

Više bankarske stope

Al-Ashak je pripisao nedavne promjene na tržištima zlata i deviza lošem upravljanju nekih državnih tijela i pozvao na strožu kontrolu cijena roba i kursa deviza, prenosi Mehr.



Pad Rijala u odnosu na dolar [AFP/Getty]

Vlasti Irana su prošle sedmice objavile da će podići bankarske kamatne stope kako bi se izborile s nestabilnošću nacionalne valute i posljedicama vanjskih sankcija. Iranski ministar ekonomskih poslova i finansija Shamsedin Hosseini je ranije izjavio da se predsjednik Mahmoud Ahmadinejad složio s Vijećem za novac i kredit, o povećanju bankarskih kamatnih stopa. "Kamatne stope na bankarske depozite će biti povećane do nivoa od 21 posto", rekao je Hosseini. Guverner centralne banke Irana Mahmoud Bahmani je prošlog četvrtka objavio novi kurs dolara od 12,260 rijala. Međutim, prema agenciji Sinhua, Bahmanijeve tvrdnje nisu značajno utjecale na crno tržište, gdje je ove sedmice jedan dolar mijenjan za 18,500 rijala.

Pad vrijednosti valute

Radi se o padu vrijednosti rijala od oko 80 posto prema dolaru, u poređenju s njegovom vrijednošću u decembru 2010. godine, kada se na "crnom tržištu" za jedan dolar moglo dobiti oko 10.700 rijala. Prošle sedmice je Evropska unija (EU) nametnula dalje sankcije na izvoz iranske nafte, kao i protiv centralne banke, potez čiji je cilj jačanje pritiska na kontroverzni nuklearni program ove države.

Ove sedmice jedan dolar je mijenjan za 18,500 rijala.

EU se odlučila na taj korak poslije sankcija SAD-a iranskoj centralnoj banci, koje su uvedene u decembru 2011. godine. Zvaničnici u Teheranu su umanjili utjecaj tih sankcija i zaprijetili da će zatvoriti strateški zaljev Hormuz ukoliko bude spriječen izvoz nafte iz Irana. Iran u velikoj mjeri zavisi od prihoda od izvoza sirove nafte i naftnih derivata.

Izvor: Al Jazeera